

չունի:

Պատմիչին երկու կերպ հասկանալ կարելի է: Կամ զիւղեր, զաւառներ եւ մասնաւոր տներ առանձին առանձին, մէկը միւսի հետ եւ բոլոր միասին միմեանց դէմ հակառակութիւններ ունէին. եւ կամ ի նկատի ունենալով կոչումի վերջին մասը, կարծել որ առանձնականութիւնք այն վէճերն են որ ծագում են սեպուհական իրաւոնքի շուրջը ընտանիքից բաժանուել, առանձնակալ գառնալ ցանկացողների միջեւ: Առանձնայատկութեանց մասին այստեղ խօսք լինել չի կարող, որովհետեւ անիմաստ է:

Պէտք է խոստովանիլ, որ Պ. Մանանդեան ոչինչ չէ կորցնում, եթէ անգամ հրաժարուի իր մեկնութիւնից: Առանձնայատկութիւնները դուրս է գալիս որ «չեն բացասում ճորտանման վիճակը, որ միեւնոյն բնութիւն պիտի ունենար Հայաստանի բոլոր շրջաններում»: Ասել է թէ յայտարարուած առանձնայատկութիւնները այլ բան չեն քան նոյն ճորտական արտի խոսեր:

Յօդուածագիրը գլխի է ընկնում, որ վերջապէս ժամ է բացատրել թէ ինչ է հասկանում ճորտութիւն ասելով: Նա գտնում է որ «ճորտ, ճորտութիւն բառերը բաւականին ճապաղ եւ խառնաչօթ գաղափարներ են»: Փորձում է պարզել:

Դուրս է գալիս որ առանձին չփոթ չկայ, որ երկու տեսակ ճորտ է եղել, համաձայն երկու տարրեր տնտեսութեան, որ մի գերման դիտնական եւ նրա հետեւութեամբ մի ռուս անուանում են Grund եւ Gutsherschaft:

Լսում ենք նաեւ, որ Հայաստանում առաջին տեսակի տնտեսութիւնը պիտի եղած լինի, այսինքն՝ որ նախարարները սեփական տնտեսութիւն չունէին, այլ ապրում էին ստացած հարկերով: Հետեւում է ապացոյց, քաղած Բիւզանդից, դժբախտաբար անյաջող: Ներսէսը պատուիրում է թագաւորին, մեծամեծներին եւ «ամենեցուն որ ոք ի վերայ ընկերին ունիցին իշխանութիւն, գութ ունելով ընդ իւրեանց ծառայս եւ ընդ կրտսերս եւ ընդ աշակերտս, սիրել իրբեւ զընտանիս եւ մի՛ անարժանս եւ աւելի տարապալմանս հարկօք նեղել քան զչափն, յուչ առնելով զի եւ նոցա տէր գոյ յերկինս»: Այստեղ խօսքը հարկերի մասին չէ բնաւ եւ

ոչ էլ նախարարների: Պատուէրն ուղղուած է բոլոր նրանց ով ստորադրեալ ունի առ հասարակ, ինչպէս տէրը՝ որ ծառայ ունի, մեծը՝ որ կրտսեր ունի, ուսուցիչը՝ որ աշակերտ ունի: Սրանց սաստուում է որ աւելորդ նեղութիւն չտան, աւելորդ բռնութիւն չգործադրեն եւ մեղմ վարուին փոքրաւորների հետ: Հարկք այստեղ տուրքի իմաստ չունի:

Հարկաւ անյաջող ապացոյցը դեռ ապացոյց չէ հակառակ դրութեան, որ նախարարները հարկ չէին ստանում, ինչպէս եւ հարկ ստանալը ինքնին դեռ չի նշանակում որ սեփական տնտեսութիւն չունէին: Երկու տեսակ տնտեսութիւն իրար բացասող երեւոյթներ չեն, այլ կարող են կենակցել բարի հարեւանութեամբ:

Գերման դիտնականից Պ. Մանանդեան լսում է, որ իսկական ճորտութեան աղբիւրը չէնց սեփական խոշոր տնտեսութիւն է. ուստի նրան հաճելի է որ մեր նախարարները միայն հարկատու զիւղեր ունենան եւ ոչ սեփական տնտեսութիւն, որպէսզի կարելի լինի յանգել միւլիթարական եզրակացութեան՝ որ «հին Հայաստանի շինականներին պէտք չէ համարել իրաւագուրկ կամ ճորտ այդ բառի լրիւ իմաստով»: Իրաւական մեղմ դրութեան պատճառն այն է, նրա կարծիքով, որ «խոշոր առեւտուրը եւ առեւտրական կապիտալը Հայաստանում չէին կատարում առանձին մեծ դեր գիւղատնտեսութեան նկատմամբ»:

Օտարոտի միտք. որքան յայտնի է, առեւտուրը եւ իր կապիտալը ջրկիրներ չեն ֆէոդալական ծառի համար. ընդհակառակը նրանց բացակայութեամբ է, որ հողը եւ կալուածատիրութիւնը ստանում է կապիտալի ոյժ եւ նշանակութիւն:

Կամենալով մօտէն որոշել շինական դասի վիճակը, Պ. Մանանդեան դիմում է կանոնադրելին, մասնաւորապէս Շահապիվանի Ժողովի կարծեցեալ կանոններին եւ տեսնում է որ շինականներն իրաւունք են ունեցել գոյք ունենալ եւ ամուսնանալ առանց կալուածատիրոջ հաճութիւնն առնելու. . .

Պ. Մանանդեան կարծում է որ խնդիրը բաւականին պարզուած է եւ կնքում է իր յօդուածը լաւատես յայտարարութեամբ որ շինականների դրութիւնը «այնքան էլ մութ ու անորոշ չէ, ինչպէս մինչեւ այժմ կարծուել է»: